

տիով, առ տեարս Գօնեցիօլբիս պատշաճեցեալ, հետի ի Գամենիցու միով մղոնաւ: Անդ ժամանեալք՝ համարէաք զպանդոկ իմն գտանել, որպէս ասէին, և ահա կիսախրամ և տիղմն ի նմին, Հրէից ևեթ պատկան անդր բնակողաց. ապա ինքնին որոնեալ ընդ գեօղն, զի ուղեկիցքն չեւ եւս էին ժամանեալք, խոտորեցայ առ շինական ոմն՝ Ֆէտուր կոչեցեալ. որ գթով ընկալեալ մարդասիրեաց, և վառամբ հնոցի ցամաքեցոյց զզգեստս. եգիտ և ըզգարեջուր ազնիւ յոյժ, զորպիսի ի Լէօպօլտոյ ցարդ ոչ ուրեք տեսի. զոր ջնուցեալ բրդեցելով հացիւ փափկապէս՝ կերինք և անդորրացաք, մինչև դարեաց անձրեւն և ցրուեցան ամպք: Անդուստ՝ ոչ սպասելով ուղեկցաց՝ ելի, և ի հասարակ աւուրն ժամանեցի ի Գամենից. և զի սյլափոխեցեալ էր յաւերածոյն, հապիւ ճանաչէի զփողոցս: Ի Առաջնորդութեամբ ումնն տեղացւոյ ժամանեցի յեկեղեցի Սրբոյն Նիկողայոսի, որ է հոգաբարձական Հայոց, և պատուասիրաբար ընկալեալ ի գեղյարգելոյ Տեառն Միքաէլէ Մուրաթեան՝ յեղբօրէ նօտարին իմոյ հանգուցելոյ, մնացի ի բնակութեան նորա, հուպ եկեղեցւոյն: Աստ լու եղև մերայնոց գալուստ իմ, և խուռն ընթացեալք արք և կանայք, ուրախութեամբ արտասուօք փարէին զինեւ. զի լուեալք էին թէ կորուսեալ իցէի, և թէ ի Սվէտաց կալանաւորեցեալ կամ սպանեցեալ: Զուարճացայ և ես ի տեսանելն զխաչինս իմս, և ի ցոյցս սիրոյ նոցա առ հովիւ իւրեանց. և մնացի յայնմ բնակութեան իբրեւ զթօթնեակս չորս: Եւ զի տեղին խարխալեցեալ էր, և սորէին խիճք և փոչիք ի տանեաց և յորմոց ի տուն անդր, հրաւիրեցեալ ի Բան Թօմասէ Ագսէնթօվից Շէտմէէնգիք յորջորջեցելոյ, ի 17 հոկտեմբերի գնացի բնակել ի սենեկին՝ որ ընդ պատուարաւ տան նորա. որոյ մայրն այրի և բարեպաշտուհի Սօֆիայ՝ ոգւով չափ տածէ և խնամէ զպանդխտութիւնս իմ: